

Na osnovu člana 20.a Zakona o radu Federacije Bosne i Hercegovine ("Službene novine Federacije BiH" broj: 26/16., broj: 89/18), člana 8. Uredbe o postupku prijema u radni odnos u javnom sektoru na području Kantona Sarajevo („Službene novine KS“ broj: 19/21, 10/22), člana 3. Odluke o imenovanju komisije br. 194/22 od 09.02.2023. godine Komisija donosi

POSLOVNIK O RADU KOMISIJE ZA PROVOĐENE PROCEDURE JAVNOG OGLAŠAVANJA ZA PRIJEM RADNIKA

I OPĆE ODREDBE

Član 1.

Ovim poslovníkom uređuje se način rada i odlučivanja Komisije za provođenje javnog oglasa za prijem radnika za pozicije: Higijeničar, Referent za sport i rekreaciju, Radnik u dječijoj igraonici, Radnik na održavanju sportskih ploha, Radnik na obezbjeđenju, Radnik na održavanju javne higijene i zelenih površina.

Član 2.

Komisija svoj rad zasniva na načelima: zakonitosti, nezavisnosti, nepristrasnosti, objektivnosti, efikasnosti i javnosti.

Član 3.

Komisija provodi postupak provođenja javnog oglasa u skladu sa odredbama: Zakona o radu Federacije Bosne i Hercegovine, Uredbe o postupku prijema u radni odnos u javnom sektoru na području Kantona Sarajevo („Službene novine KS“ broj: 19/21, 10/22).

II KOMISIJA ZA PROVOĐENJE POSTUPKA

Član 4.

Komisija ima neparan broj članova i sastavljena je od: Predsjednika i dva člana komisije.

Članovi Komisije moraju imati najmanje isti stepen stručne spreme kao i kandidat/ti za čiji je prijem u radni odnos objavljen oglas.

Administrativno-tehničke poslove za Komisiju obavlja sekretar koga imenuje Direktor Preduzeća.

Član 5.

Član Komisije će odmah ili najkasnije dva dana od dana saznanja za razloge izuzeća zatražiti izuzeće u Komisiji, ukoliko je srodnik nekog od prijavljenih kandidata u pravoj ili bočnoj liniji do četvrtog stepena i u tazbinskoj liniji do drugog stepena.

O zahtjevu za izuzeće iz stav 1. ovog člana Direktor Preduzeća donosi odluku najkasnije u roku od tri dana od dana podnošenja zahtjeva, a protiv ove odluke žalba nije dozvoljena.

Član 6.

Ukoliko predsjednik ili neki od članova komisije privremeno, trajno ili u dužem vremenskom periodu bude spriječen da vrši svoju dužnost, dužan je odmah pismenim putem obavijestiti Direktora Preduzeća radi imenovanja novog člana na tu dužnost.

Član 7.

Komisija obavezno radi u punom sastavu, te odlučuje o svim pitanjima iz svoje nadležnosti većinom glasova.

Sastanci Komisije se održavaju na zahtjev predsjednika koji vodi sastanke i potpisuje svu potrebnu dokumentaciju.

O svom radu Komisija vodi zapisnik, koji je sastavni dio dokumentacije, a isti potpisuju predsjednik i sekretar komisije.

III POSTUPAK PROVOĐENJA

Član 8.

Po isteku roka za podnošenje prijave za javni oglas, Komisija je dužna da u što skorijem roku pregleda sve pristigle prijave i dostavljene dokaze, utvrđuje njihovu ispravnost i sastavlja spisak kandidata među kojima se provodi izborni postupak.

Spisak kandidata iz stava 1. ovog člana potpisuju svi članovi komisije.

Komisija pisanim putem obavještava kandidate čija je dokumentacija nepotpuna odnosno neblagovremena da nisu na spisku kandidata među kojima se provodi izborni postupak, sa navođenjem razloga zašto pristigla prijava nije ispravna uz mogućnost uvida u dostavljenu dokumentaciju, u roku od tri dana od dana prijema obavijesti.

Član 9.

Komisija provodi pismeni i usmeni ispit sa svim kandidatima koji ispunjavaju opće i posebne uslove propisane tekstom javnog oglasa. Pismeni ispit će se vrednovati sa 60 bodova, a usmeni sa 40 bodova.

Maksimalan broj bodova koje kandidati mogu ostvariti, bez prednosti prednosti po osnovu posebnih propisa, (uključujući pismeni i usmeni ispit) iznosi: 100 bodova.

Član 10.

Pismeni ispit priprema Komisija za provođenje javnog oglasa i sastavljen je od pitanja koja su objavljena na internet stranici Preduzeća, a dostupna su i kod Poslodavca. Pismeni ispit se sastoji od 10 pitanja za koje je ponuđeno nekoliko odgovora od kojih je samo jedan tačan. Svaki tačan odgovor vrednuje se sa 6 bodova. Kandidat koji odgovori tačno na sva pitanja može osvojiti maksimalno 60 bodova.

Član 11.

Pitanja za pismeni ispit su objavljena na internet stranici preduzeća, a dostupna su i kod poslodavca, te je utvrđena literatura i oblasti kojima će se komisija voditi prilikom provođenja ispita, i to, kako slijedi:

Pozicija br. 1. – Higijeničar

Literatura i oblast: Zakon o zaštiti stanovništva od zaraznih bolesti, Zakon o zaštiti od požara i vatrogastvu FBiH („Službene novine Federacije BiH, br. 64/09), čišćenje i održavanje prostorija, te poznavanje sredstava i opreme za rad

Pozicija br. 2. – Referent za sport i rekreaciju

Literatura i oblast: Zakon o zaštiti od požara i vatrogastvu FBiH („Službene novine Federacije BiH, br. 64/09), Zakon o fiskalnim sistemima (“Službene novine Federacije BiH”, broj: 81/09), poznavanje i rad na fiskalnim uređajima, poznavanje sredstava i opreme u sportskim objektima

Pozicija br. 3. – Radnik u dječijoj igraonici

Literatura i oblast: Zakon o zaštiti od požara i vatrogastvu FBiH („Službene novine Federacije BiH, br. 64/09), Zakon o fiskalnim sistemima (“Službene novine Federacije BiH”, broj: 81/09), poznavanje i rad na fiskalnim uređajima

Pozicija br. 4. – Radnik na održavanju sportskih ploha

Literatura i oblast: Zakon o zaštiti od požara i vatrogastvu FBiH („Službene novine Federacije BiH, br. 64/09), poznavanje postupka održavanja sportskih terena, poznavanje alata i materijala potrebnih za održavanje terena

Pozicija br. 5. – Radnik na obezbjeđenju

Literatura i oblast:

- Zakon o agencijama i unutrašnjim službama za zaštitu ljudi i imovine FBiH („Službene novine Federacije BiH“, br. 78/08 i 67/13)
- Pravilnik o načinu korištenja vatrenog oružja i fizičke sile tokom vršenja poslova fizičke zaštite ljudi i imovine („Službene novine Federacije BiH",br. 31/09)
- Pravilnik o vatrenom oružju za obavljanje poslova fizičke zaštite ljudi i imovine („Službene novine Federacije BiH",br. 92/14)
- Pravilnik o sadržaju , obavezama i načinu vršenja radnji koje preduzima čuvar, korištenja vatrenog oružja i fizičke sile tokom obavljanja poslova fizičke zaštite ljudi i imovine („Službene novine Federacije BiH",br. 92/14)
- Zakon o zaštiti od požara i vatrogastvu FBiH („Službene novine Federacije BiH, br. 64/09)

Pozicija br. 6. – Radnik na održavanju javne higijene i zelenih površina

Literatura i oblast: Zakon o zaštiti stanovništva od zaraznih bolesti, Zakon o zaštiti od požara i vatrogastvu FBiH („Službene novine Federacije BiH, br. 64/09), poznavanje tehnika i alata neophodnih za održavanje zelenih površina i javne higijene

Član 12.

Komisija prilikom usmenog ispita/intervjua obavlja razgovor pojedinačno sa kandidatom. Pitanja mogu postavljati svi članovi Komisije, a pitanja se odnose na: oblast stručnog znanja, opšte znanje kandidata o Preduzeću (djelatnost, status preduzeća, sjedište preduzeća, propisi koji regulišu djelatnosti Preduzeća) i opis radnog mjesta za koje se kandidat prijavljuje.

Svaki član Komisije učestvuje u intervjuu, postavlja pitanja i ocjenjuje kandidata. Makimalan broj bodova koje kandidat može osvojiti na usmenom ispitu/intervjuu je 40 bodova. Rezultat intervjuu će biti zbir bodova koji su dali svi članovi podjeljen sa brojem članova Komisije za izbor.

Član 13.

Komisija će se prilikom sastavljanja Liste uspješnih kandidata voditi sa ukupno ostvarenim bodovima. Lista uspješnih kandidata će se utvrditi na osnovu zbira broja bodova ostvarenih na pismenom ispitu, usmenom ispitu i prednosti po osnovu posebnih propisa, odnosno u skladu sa članom 23. Zakona o dopunskim pravima boraca – branitelja („Službene novine KS“, broj: 45/12, 26/14 i 46/17), Uredbom o jedinstvenim kriterijima i pravilima za zapošljavanje branilaca i članova njihovih porodica u institucijama u Kantonu Sarajevo, Gradu Sarajevu i općinama u Kantonu Sarajevo („Službene novine KS“, broj: 37/20) i Instrukcijom o bližoj primjeni kriterija vrednovanja prema Uredbi o jedinstvenim kriterijima i pravilima za zapošljavanje branilaca i članova njihovih porodica u institucijama u Kantonu Sarajevo, Gradu Sarajevu i općinama u Kantonu Sarajevo („Službene novine KS“, broj: 38/20).

Član 14.

Listu uspješnih kandidata sa ostvarenim bodovima Komisija će zajedno sa potpisanim zapisnicima o radu komisije dostaviti poslodavcu u roku od 3 (tri) dana nakon obavljenog usmenog dijela ispita sa kandidatima.

IV PRELAZNE I ZAVRŠNE ODREDBE

Član 15.

Poslovník se ne može mijenjati u toku trajanja postupka prijema u radni odnos.

Član 16.

Ovaj Poslovník stupa na snagu danom donošenja, i primjenjivat će se do okončanja konkursne procedure i potpisivanja ugovora o radu sa izabranim kandidatima.

Član 17.

Ovaj Poslovník objavljuje se na web stranici preduzeća i ostaje na istoj do okončanja konkursne procedure odnosno do potpisivanja ugovora o radu sa izabranim kandidatima.

Broj: 214 /23
Datum: 14.02.2023.godine

